

近代中國史料叢刊第九十四輯

沈雲龍主編

曾文正公（國藩）事略

王定安撰

文海出版社
有限公司印行

曾文正公事畧卷一

合肥李鴻章審定

東湖王定安譔

太傅曾文正公諱國藩字滌生

原名子城
字伯涵

先世居楚之衡

陽

國初有名子孟學者始遷湘鄉之大界里遂爲湘鄉人子學士

元吉元吉之仲子曰輔臣者公之高祖也輔臣生竟希

誥贈光祿大夫妣彭氏

誥贈一品夫人竟希生玉屏字星岡是爲公王父初

封中憲大夫累

贈光祿大夫妣王氏初

封恭人累

贈一品夫人曾氏自明以來世業農積善孝友而不顯於世星
岡公少時喜任俠已乃折節下士嘗曰吾少耽游惰往還
湘潭市肆與裘馬少年相逐或日高酣寢長老有譏以浮
薄將覆其家者余聞而立起自責貨馬徒行自是終身未
明而起余年三十五始講求農事居枕高嶺山下壠峻如
梯田小如瓦吾鑿石決壤開十數畝而通爲一然後耕父
易於從事吾所宵行水聽蟲鳥鳴聲以知節候觀露上禾
顛以爲樂種蔬半畦晨而耘吾任之夕而糞庸保任之入
而飲豕出而養魚彼此雜職之凡菜茹手植而手擷者其

味彌甘凡物親歷艱苦而得者食之彌安也吾宗自元明
居衡陽之廟山久無祠宇吾謀之宗族諸老建立祠堂歲
以十月致祭自

國初遷居湘鄉至吾曾祖元吉公基業始宏吾又謀之宗族別
立祀典歲以三月致祭世人禮神徼福求諸幽遐吾以爲
神之陟降莫親於祖考故獨隆於生我一本之祀而他祀
姑闕焉後世雖貧禮不可墮子孫雖愚家祭不可簡也吾
早歲失學壯而引爲深恥旣令子姓出就名師又好賓接
文士候望音塵常願通材宿儒接跡吾門此心乃快其次
老成端士敬禮不怠其下汎應羣倫至於巫醫僧徒堪輿

星命之流吾屏斥之惟恐不遠舊姻窮乏遇之惟恐不隆
識者觀一門賓客之雅正疏數而卜家之興敗理無爽者
鄉黨戚好吉則賀喪則弔有疾則問人道之常也吾必踐
焉必躬焉財不足以及物吾以力助焉鄰里訟爭吾常居
間以解兩家之紛其尤無狀者厲辭詰責勢若霆摧而理
如的破悍夫往往神沮或具尊酒通殷勤一笑散去君子
居下則排一方之難在上則息萬物之囂其道一耳津梁
道途廢壞不治者孤嫠衰疾無告者量吾力之所能隨時
圖之不無小補若必待富而後謀則天下終無可成之事
矣 星岡公生三子長曰竹亭諱麟書累

封光祿大夫公之父也仲曰上臺早卒季口驥雲以公貴累

封光祿大夫竹亭封翁生子五人公居長次國潢字澄侯次國

華字溫甫次國荃字沆浦次國葆字事恆封翁積苦力學

久困於學政之試徒步橐筆以干有司年四十三始補縣

學生員事星岡公以孝聞星岡公生平督子最嚴往往稠

人廣坐壯聲呵斥或有不快於他人亦痛繩其子竟日噤

噤詰數愆尤封翁屏氣負牆蹣跚徐進愉色如初星岡公

晚年病痿痺動止不良又瘖不能言卽有所需以頤使以

目求卽有苦蹙頷而已封翁朝夕奉事常先意而得之夜

侍寢慮星岡公雅不欲煩煩驚召而他僕殊不稱意前後

洩益數一夕六七起封翁時其將起則進器承之少間又
如之聽於無聲不失分寸嚴寒大洩則令他人啟移手足
而身翼護之或微沾汗輒滌除易中衣拂動甚微終宵惕
息明且則驥雲入侍奉事一如封翁之法久而諸孫孫婦
內外長幼感化訓習爭取垢汗襦袴浣濯爲樂不知其有
臭穢或挽篋與遊戲庭中各有常程病凡三載封翁未嘗
一日安枕也 妣江太夫人同邑江沛霖女事舅姑四十
餘年饕餮必躬在視必恪賓祭之儀百方檢飭尺布寸縷
皆一手拮据江太夫人以嘉慶辛未年十月十一日亥時
誕公於口陽坪里第是時竟希公年七十矣忽夢有巨物

蜿蜒自空而下首屬於梁尾蟠於柱鱗甲森然不敢俯視
竟希公驚寤已而公生年十六應郡縣試旋取佾生 道

光十三年補縣學生員學使為岳鎮南 明年甲午科鄉試中式

第三十六名舉人時年二十四座主為徐雲瑞許乃安房師為張啟庚 十

八年戊戌科會試中式第三十八名貢士座主為穆彰阿朱士彥吳文鎔

廖鴻荃房師為季芝昌

正大光明殿覆試一等

殿試三甲第四十二名

賜同進士出身

朝考進呈擬一等第三名

宣宗拔置第二名改翰林院庶吉士 庚子科散館二等第十
九名授檢討旋派順天鄉試磨勘官 二十一年十月充

國史館協修官 二十三年三月

大考翰詹列二等第一名奉

旨以翰林院侍講升用 六月

詔以公爲四川正考官趙楫副之 七月補翰林院侍講 十

一月回京 充文淵閣校理 二十四年二月侍班於文

淵閣觀經筵大典 五月

召見於勤政殿 充翰林院教習庶吉士 十二月轉補翰林

院侍讀 二十五年乙巳科會試充第十八房同考官

五月升授詹事府右春坊右庶子 九月擢翰林院侍講
學士謝

恩

召見 十二月補日講起居注官充文淵閣直閣事 二十七年

大考翰詹列二等奉

旨記名遇缺題奏

賞大卷緞二件 六月升授內閣學士兼禮部侍郎銜謝

恩

召見於勤政殿 充考試漢教習閱卷大臣 七月公弟國奎

補縣學生員 十月充武會試正總裁又派殿試讀卷大臣
二十八年七月公弟國荃補廩膳生 九月充稽察
中書科事務 二十九年正月

詔授禮部右侍郎謝

恩

召見

上嘉勉焉 二月十四日值班

召見三十日又

召見每有奏對

上輒嘉賞 八月兼署兵部右侍郎 充宗室舉人覆試閱卷

大臣 九月充順天鄉試覆試閱卷大臣 十月充順天
武鄉試校射大臣 三十年正月十四日

宣宗成皇帝升遐

文宗嗣位

咨以郊配廟祔大禮公具疏條陳

上嘉納之 二月內賜

遺念衣一件玉珮一事 三月應

詔陳言奉

旨獎許舉行日講事宜 四月充庚戌科會試覆試閱卷大臣

又派朝考閱卷大臣 五月禮部考試優貢 六月兼署

工部左侍郎 充朝考拔貢閱卷大臣 七月公弟國葆

補縣學生員 八月

召見詢以工部職務奏對稱

旨 充考試國子監學正學錄閱卷大臣 九月充

宣宗梓宮前恭捧

冊寶大臣禮畢加二級 十月兼署兵部左侍郎

咸豐元年

詔中外大臣保舉賢才公疏薦浙江知縣江忠源可大用得
旨赴部引

見 三月疏陳簡練軍實以裕

國用

召見嘉勉 四月上敬陳

聖德一疏語多切直朝士皆憂其獲譴及

優詔褒答一時稱盛事焉 五月兼署刑部左侍郎 八月充

順天鄉試搜檢大臣 十月充順天武鄉試正考官沈兆

霖副之試竣覆

命

召見 十一月監視

郊壇開工 十二月上備陳民間疾苦一疏奉

旨交部議奏 監視

慕陵隧道開工

咸豐二年正月兼署吏部左侍郎 二月隨扈祇謁

慕陵 三月疏請寬免勝保處分以廣言路

上嘉納之 充王子科會試搜檢大臣 又派恭送

太廟冊寶大臣 四月以

宣宗升配恩加一級 六月

詔以公爲江西正考官謝

恩附奏請試竣回籍

殊批允之 七月行次安徽太湖縣聞母江太夫人之訃匍匐

奔喪 八月抵家 九月葬江太夫人 時粵匪洪秀全

等由廣西竄長沙圍攻三閱月不克十月解圍去掠船浮
洞庭湖而下陷岳州十一月陷漢陽十二月陷武昌湖北
巡撫常大滄等死之大江南北土匪蜂起

詔諭湖南巡撫張亮基曰丁憂侍郎曾國藩籍隸湘鄉於湖南
地方人情自必熟悉著該撫傳旨令其幫同辦理本省團
練搜查土匪事宜伊必盡心不負委任亮基錄

詔示公公以奉諱歸家不宜與聞軍事草疏懇終制方發使就
道適庶吉士郭嵩燾至力勸公出公弟國荃亦贊之於是
始治兵於長沙命羅澤南王鑫等領湘勇三營仿明戚繼
光東伍成法逐日操練是爲湘軍創立之始 澤南初以

諸生講學家居湘鄉知縣朱孫詒檄辦團練有效公欲招
與治軍澤南不可公使其友劉蓉說之澤南始應命凡營
制營規公皆與商推訂定其門弟子後多爲名將云

咸豐三年正月編查保甲設發審局一時巨姦大慝多被
誅戮盜賊屏息莠民多改而從善遠近大驩遣劉長佑
李輔朝王金搜剿常甯耒陽土匪賊聞風驚潰遣羅澤
南討衡山土匪破平之時粵匪洪秀全棄武昌劫取東
下男婦數十萬人舳艫蔽江疊陷沿江郡縣十七日陷安
慶二月初十日陷金陵據爲僞都將軍祥厚總督陸建瀛
等死之

欽差大臣向榮追師駐金陵城外號江南大營

詔授江忠源爲湖北按察使飭赴江南大營幫辦軍務會湖北崇通兩邑土匪大起公遣軍與忠源會剿平之忠源乃率師而東 三月

詔以駱秉章署理湖南巡撫 時永桂以上會匪充斥亂者紛起每警報至公酌量緩急分營往捕議定卽傳檄促行遣左右料簡軍裝火藥軍行無踰兩日者所至捕斬首惡搜查餘黨數日而定鄉里晏然 四月江忠源師次九江值安慶再陷賊船上犯湖口忠源偵賊所向卽日開道馳赴南昌部署略定而賊至忠源告急於湖南公檄江忠淑由

瀏陽赴江西朱孫詒羅澤南等由醴陵繼進另派鎮守兵
千人令夏廷樾總統之會朱孫詒有違言湘勇無統帥郭
嵩燾說孫詒率所部以行嵩燾因亦隨行是為湘軍出境
勦賊之始 六月公疏薦參將塔齊布千總諸殿元請破
格超擢奉

旨塔齊布賞副將銜諸殿元以守備用 七月湘軍抵南昌南
昌城外賊壘惟文孝廟數座官軍屢攻不能克日有死傷
郭嵩燾偶獲賊謀訊之則賊皆舟居文孝廟賊壘環三面
築牆而虛其後專以翼蔽賊舟而已嵩燾因獻議曰東南
各行省州縣多阻水江湖一日遇風連數百里賊舟瞬息

可達官兵率由陸路躡之其勢常不及長江數千里之險
遂獨爲賊所有且賊上犯以舟楫而官軍以營壘禦之求
與一戰而不可得宜賊勢之日昌也忠源大韙之卽日具
疏請

飭湖南湖北四川仿照廣東拖罈船式各造戰艦數十飭廣東
製備礮位以供戰艦之用並交會國藩管帶部署奉

旨允行長江水師之議自此始 八月公疏稱衡永郴桂匪徒
聚集之藪數月以來巨案迭出卽日移駐衡州就近調度
蓋提督鮑起豹時與公相齟齬營兵與湘勇斷斷不和至
有械鬪之案衡州之行所以避之也 公旣至衡州衡陽

虞生彭玉麟故有名公一見器之又調湘陰外委楊載福
至並令幫辦弟國葆營務國葆力薦彭楊之才當任一軍
不宜屈爲幫辦公方謀治水師乃檄二人各募水勇領一
營彭楊受命治水師自此始 南昌解嚴賊陷九江府分
股竄湖北署湖廣總督張亮基師潰於田家鎮江忠源聞
道馳援戰不利北屯廣濟賊遂趨武昌

詔以吳文鎔爲湖廣總督文鎔公座師也聞警急馳赴鄂而賊
已陷黃州漢陽北擾德安南及興國岳州戒嚴公與湖南
巡撫駱秉章籌辦防堵檄調援江西諸軍回湘

上諭長江上游武昌最爲扼要若稍有疏虞則全楚震動著駱

葉章會國籓選派兵勇酌撥駁船派委得力鎮將馳赴下
游與吳文鎔等會合勦辦文鎔復屢疏請援師

朝廷益趣公北行會武昌解嚴公疏請暫緩赴鄂又言該匪
以舟楫爲巢穴欲加攻勦必以戰船爲第一務臣擬在衡
州試試俟有頭緒卽請親自統帶馳赴下游

硃批所慮甚是汝能斟酌緩急甚屬可嘉欽此 十月江忠源
疏請

飭公以所練六千人出省剿賊奉

旨報可忠源回軍漢陽

詔授爲安徽巡撫並

諭楚皖一體斟酌緩急相機進剿時安慶已爲賊踞議建廬州
爲省會忠源受命力疾北趨廬州 十一月朱晉奏會國
藩鄉望素孚人樂爲用請

飭挑選練勇僱覓船隻順流東下與江忠源水陸夾擊
上以疏示公

諭曰現在安徽逆匪連陷桐城舒城逼近廬郡呂賢基殉難江
忠源患病皖省情形危急總由江面無水師攔截進剿任
令賊蹤往來自如該侍郎前奏亦曾慮及著卽趕辦船隻
礮位並前募勇六千由洞庭湖駛入大江與江忠源水陸
夾擊該侍郎忠誠素著兼有膽識朕所素知必能統籌全

局不負委任也公疏稱籌備水陸各軍赴援安徽須俟購
買夷礮廣礮千尊解到乃可成行又請設立水路糧臺
硃批現在安徽待援甚急若必偏執已見則太覺遲緩朕知汝
尙能激發夫良故特命汝赴援以濟燃眉今觀汝奏直以
數省軍務一身克當試問汝之才力能乎否乎平時漫自
矜詡以爲無出已之右者及至臨事果能盡符其言甚好
若稍涉張皇豈不貽笑於天下著設法趕緊赴援能早一
步卽得一步之益汝能自擔重任迥非畏葸者比言旣出
諸汝口必須盡如所言辦與朕看公疏稱餉乏兵單成效
不敢必與其將來毫無功效受大言欺君之罪不如此時

據實陳明受畏憚不前之罪

殊批成敗利鈍固不可逆睹然汝之心可負天日非獨朕知若甘受畏憚之罪殊屬非是欽此 常甯土匪攻陷縣城連陷嘉禾藍山二縣遣弟國葆及儲致躬等討平之 十二月疏稱衡永郴桂尚有會匪餘黨實爲湖南巨患亦是臣經手未完之件

殊批汝以在籍人員能如是出力已屬可嘉著知會撫臣勦辦或有汝素來深信之紳士酌量辦理亦可欽此 賊陷廬州府安徽巡撫江忠源死之

咸豐四年正月湖廣總督吳文鎰戰歿於黃州武昌戒嚴

上諭此時惟會國藩統帶礮船兵勇迅速順流而下直抵武昌
可以扼賊之吭此舉關係南北大局甚爲緊要該侍郎應
能深悉緊急情形兼程赴援也 先是公在衡州創立水
師前無成法每遇廣東員弁及長年三老能行船者周咨
博采屢更其制後乃稍仿廣東拖罟快蟹長籠之式增置
槳座命守備成名標監督之檄廣西同知褚汝航夏鑾等
分設一廠於湘潭旣成軍邀長沙黃冕觀之冕獻言曰吾
出入兵閒十餘年所見軍容整齊無及此者然長江千里
漢港紛歧賊船易於藏匿江南小戰船曰三板者每營請
添十號以備搜剿漢港之用公大聽之卽日改定營制每

營置快蟹一營官領之長龍十曰正哨三板十曰副哨快
蟹槳工二十八人檣八人長龍槳工十六人檣四人三板
槳工十人每船另置礮手三人艚長一人頭工二人舵工
一人副舵二人水師之制於是大備公既聞江忠源吳文
鎔相繼殉節乃經營東征集水師五千人以褚汝航爲總
統而成名標諸殿元楊載福彭玉麟鄒漢章龍獻琛等分
領之又募陸師五千人以塔齊布爲先鋒而周鳳山儲玫
躬林源恩鄒世琦鄒壽璋楊名聲及弟國葆等分領之始
設立八所曰文案所曰內銀錢所曰外銀錢所曰軍械所
曰火器所曰偵探所曰醫審所曰採編所皆委員司之齋

米煤鹽油及軍火器械載民船百數十號以行員弁勇夫
共一萬七千餘人軍容於斯爲盛 二月賊陷岳州府遂
由湘陰趨靖港陷甯鄉駱秉章遣王鑫敗賊於喬口公舟
師次長沙遣弟國葆及儲玖躬趙煥聯等分道攻剿玖躬
破賊於甯鄉逐北陣亡賊大奔潰遣舟師追擊走之 時
貴州候補道胡林翼應前總督吳文鎔之調帶練勇六百
名由黔赴鄂行次金口聞文鎔已歿賊舟上犯蔽遮不得
前公急調之回湘谷商駱秉章支給餉糈胡林翼以一軍
從公剿賊自此始

上諭據青麟奏稱探聞會國藩帶勇已距金口百有餘里貴州

道員胡林翼隨同前來現復退往上游賊船驟忽上竄急
須出其不意順流轟擊該侍郎礮船早入楚北胡林翼何
以退守金口著曾國藩飭知該道迅速前進毋稍遲延公
疏陳胡林翼未能赴鄂之由且稱林翼之才勝臣十倍將
來可倚以辦賊旋檄林翼勦崇陽通城土匪又令塔齊布
往助之 官軍旣克湘陰賊之在岳州者全數遁逸 三
月公至岳州搜捕西湖餘匪 巡撫駱秉章疏請留公暫
緩赴鄂

竊批楚南之賊明係分竄現在湖北尙有多賊曾國藩礮船原
爲肅清江面第此時道路不通暫可留在湖南勦辦亦不

能專待事竣緩緩北上楚南辦有頭緒仍應速赴湖北爲是會國藩素明大義諒不至專顧桑梓置全局於不問北重於南皖鄂重於楚南此不易之局也又奉

寄諭此時得力舟師專恃會國藩水師一軍儻涉遲滯致令漢陽大股竄踞武昌則江潯更形阻隔朕旣以剿賊重任畀之會國藩一切軍情不爲遙制欽此 先是公派陸軍由崇通剿賊冀以次掃盪進援武昌而自統水師順流而下旣至岳州遭風撞損礮船而王鑫之軍抵羊樓司者遇賊潰回賊乘勝上犯公弟國葆及鄒壽璋楊名聲等營皆潰退入城賊攻城甚急公檄舟師登岸擊賊拔出城中軍民

會通文獻卷之七
三
退保長沙因上疏自劾

上諭會國藩秦水陸各軍接仗情形並自請治罪一摺此次岳州水軍雖獲小勝惟因陸路失利以致賊匪復行上竄會國藩統領水陸諸軍調度無方實難辭咎著交部嚴加議處仍著督帶師船迅速進剿克復岳州卽行赴援武昌毋得再有遲誤又奉

諭會國藩所統各勇爲數過多旣須勦辦粵匪又須搜捕土匪卽如所奏有撥赴平江通城者有撥赴臨湘蒲圻者又有不能依限前進者散布各處照料旣不能周勦捕自難得力一有敗衄人無固志似此何能力圖進取此時肅清江

面專恃此軍曾國藩初次接仗卽有挫失且戰船被風沈
損多隻何事機不順若是現在湖北待援孔亟曾國藩以
在籍紳士專顧湖南不爲通籌大局之計平日所以自許
者何在欽此 先是公在衡州奏請原任湖北巡撫楊健
入祀鄉賢祠部議革職至是奉

旨改爲降二級調用 胡林翼敗賊於上路市 塔齊布敗賊

於河平 公因長沙戒嚴檄胡林翼塔齊布回湘助防

賊踞靖港分股由甯鄉陷湘潭遂於湘水上游掠民船數
百豎立本城以阻援師二十八日塔齊布率師赴援大捷
於湘潭斬馘數千級 四月初一日公遣楊載福等率水

師援湘潭會陸軍大破之初二日公親督師邀擊賊於靖港西南風發水勢迅急爲賊所乘師潰公自投於水左右救之獲免而是日水師之在湘潭者復大捷初三日水師焚賊船淨盡塔齊布諸軍復獲大勝初五日克湘潭縣自粵匪稱亂以來此次始受大創官兵亦稍自奮人人有殺敵致果之心矣 公回長沙重整水陸各軍因言吾水陸萬人非不多而遇賊卽潰岳州之敗水師托敵者楊載福一營湘潭之敗陸師塔齊布兩營水師楊載福兩營用此益知兵貴精不貴多而引諸葛公祁山之敗且謀減兵省食勤求已過又曰占人用兵先明功罪賞罰今時事艱難